

必至滅度之願

難思議往生

顯淨土真實證文類四

愚禿釋親鸞集

謹顯真實證者則是利他圓滿之妙位無上
 涅槃之極果也即是出於必至滅度之願亦
 名證大涅槃之願也然煩惱成就凡夫生死
 罪濁群萌獲往相廻向心行即時入大乘正
 定聚之數住正定聚故必至滅度必至滅度
 即是常樂常樂即是畢竟寂滅寂滅即是無

明治
 45. 4. 19
 內交

上涅槃無上涅槃卽是無爲法身無爲法身卽是實相實相卽是法性法性卽是真如眞如卽是一如然者彌陀如來從如來生示現報應化種種身也必至滅度願文大經言設我得佛國中人天不住定聚必至滅度者不取正覺上無量壽如來會言若我成佛國中有情若不決定成等正覺證大涅槃者不取菩提上願成就文經言其有衆生生彼國者

皆悉住於正定之聚所以者何彼佛國中無諸邪聚及不定聚又言彼佛國土清淨安穩微妙快樂次於無爲泥洹之道其諸聲聞菩薩天人智慧高明神通洞達咸同一類形無異狀但因順餘方故有人天之名顏貌端正超世希有容色微妙非天非人皆受自然虛無之身無極之體又言彼國衆生若當生者皆悉究竟無上菩提到涅槃處何以故若邪

定聚及不定聚不能了知建立彼因故抄已要上
淨土論曰莊嚴妙聲功德成就者偈言梵聲
悟深遠微妙聞十方故此云何不思議經言
若人但聞彼國土清淨安樂尅念願生亦得
往生卽入正定聚此是國土名字爲佛事安
可思議莊嚴主功德成就者偈言正覺阿彌
陀法王善住持故此云何不思議正覺阿彌
陀不可思議彼安樂淨土爲正覺阿彌陀善

力住持云何可得思議耶住名不異不滅持
名不散不失如以不朽藥塗種子在水不爛
在火不焦得因緣卽生何以故不朽藥力故
若人一生安樂淨土後時意願生三界教化
衆生捨淨土命隨願得生雖生三界雜生水
火中無上菩提種子畢竟不朽何以故以逕
正覺阿彌陀善住持故莊嚴眷屬功德成就
者偈言如來淨華衆正覺華化生故此云何

不思議凡是雜生世界若胎若卵若濕若化
眷屬若干苦樂萬品以雜業故彼安樂國土
莫非是阿彌陀如來正覺淨華之所化生同
一念佛無別道故遠通夫四海之內皆爲兄
弟也眷屬無量焉可思議又言願往生者本
則三三之品今無一二之殊亦如淄澠反食陵
一味焉可思議又論曰莊嚴清淨功德成就
者偈言觀彼世界相勝過三界道故此云何

不思議有凡夫人煩惱成就亦得生彼淨土
三界繫業畢竟不牽則是不斷煩惱得涅槃
分焉可思議抄已要上安樂集云然二佛神力應
亦齊等但釋迦如來不申已能故顯彼長欲
使一切衆生莫不齊歸是故釋迦處處嘆歸
須知此意也是故曇鸞法師正意歸西故傍
大經奉讚曰安樂聲聞菩薩衆人天智慧咸
洞達身相莊嚴無殊異但順他方故列名顏

容端正無可比精微妙軀非人天虛無之身
無極體是故頂禮平等力上光明寺疏云言
弘願者如大經說一切善惡凡夫得生者莫
不皆乘阿彌陀佛大願業力爲增上緣也又
佛密意弘深教門難曉三賢十聖弗測所闕
况我信外輕毛敢知旨趣仰惟釋迦此方發
遣彌陀卽彼國來迎彼喚此遣豈容不去也
唯可懃奉法畢命爲期捨此穢身卽證彼法

性之常樂又云西方寂靜無爲樂畢竟逍遙
離有無大悲熏心遊法界分身利物等無殊
或現神通而說法或現相好入無餘變現莊
嚴隨意出群生見者罪皆除又讚云歸去來
魔鄉不可停曠劫來流轉六道盡皆逕到處
無餘樂唯聞愁歎聲畢此生平後入彼涅槃
城上夫按真宗教行信證者如來大悲廻向
之利益故若因若果無有一事非阿彌陀如

來清淨願心之所。廻向成就。因淨。故果亦淨。也應知。

二言還相。廻向者。則是利他教化地益也。則是出於必至補處之願。亦名一生補處之願。亦可名還相。廻向之願也。顯註論。故不出願文。可披論註。淨土論曰。出第五門者。以大慈悲觀察一切苦惱衆生。示應化身。廻入生死園煩惱林中。遊戲神通。至教化地。以本願力

廻向。故是名出第五門。上論註曰。還相者。生彼土已。得奢摩他毘婆舍那方便力。成就廻入生死稠林。教化一切衆生。共向佛道。若往若還。皆爲拔衆生。渡生死海。是故言廻向爲首。得成就大悲心。故又言。卽見彼佛。未證淨心。菩薩畢竟得證平等法身。與淨心。菩薩與上地諸菩薩。畢竟同得寂滅平等。故平等法身者。八地已上。法性生身。菩薩也。寂滅平等

者卽此法身菩薩所證寂滅平等之法也。以得此寂滅平等法故名爲平等法身。以平等法身菩薩所得故名爲寂滅平等法也。此菩薩得報生三昧以三昧神力能一處一念一時徧十方世界種種供養一切諸佛及諸佛大會衆海能於無量世界無佛法僧處種種示現種種教化度脫一切衆生常作佛事初無往來想供養想度脫想是故此身名爲平等

法身此法名爲寂滅平等法未證淨心菩薩者初地已上七地以還諸菩薩也。此菩薩亦能現身若百若千若萬若億若百千萬億無佛國土施作佛事要須作心入三昧乃能非不作心以作心故名爲未證淨心。此菩薩願生安樂淨土卽見阿彌陀佛見阿彌陀佛時與上地諸菩薩畢竟身等法。等龍樹菩薩婆藪槃頭菩薩輩願生彼者當爲此耳。問曰按

十地經菩薩進趣階級漸有無量功勳逕多劫數然後乃得此云何見阿彌陀佛時畢竟與上地諸菩薩身等法等耶答曰言畢竟者未言卽等也畢竟不失此等故言等耳問曰若不卽等復何待言菩薩但登初地以漸增進自然當與佛等何假言與上地菩薩等答曰菩薩於七地中得大寂滅上不見諸佛可求下不見衆生可度欲捨佛道證於實際爾

時若不得十方諸佛神力加勸卽便滅度與二乘無異菩薩若往生安樂見阿彌陀佛卽無此難是故須言畢竟平等復次無量壽經中阿彌陀如來本願言設我得佛他方佛土諸菩薩衆來生我國究竟必至一生補處除其本願自在所化爲衆生故被弘誓鎧積累德本度脫一切遊諸佛國修菩薩行供養十方諸佛如來開化恒沙無量衆生使立無上

正真之道，超出常倫。諸地之行，現前修習。普賢之德，若不爾者，不取正覺。按此經，推彼國菩薩，或可不從一地至一地，言十地階次者，是釋迦如來於閻浮提一應化道耳。他方淨土，何必如此五種不思議中。佛法最不可思議，若言菩薩必從一地至一地，無超越之理，未敢詳也。譬如，有樹名曰好堅，是樹地生百歲，乃具一日長高百丈，日日如此，計百歲之

長，豈類脩松耶。見松生長，日不過寸，聞彼好堅，何能不疑。即日有人聞釋迦如來證羅漢於一聽制，無生於終朝，謂是接誘之言，非稱實之說。聞此論事，亦當不信。夫非常之言，不入常人之耳，謂之不然，亦其宜也。略說八句，示現如來自利利他功德莊嚴次第，成就應知此云何次第。前十七句是莊嚴國土功德，成就既知國土相應，知國土之主，是故次觀

佛莊嚴功德，彼佛若爲莊嚴於何處坐，是故先觀座。既知座已宜，知座主，是故次觀佛莊嚴身業。既知身業，應知有何聲名，是故次觀佛莊嚴口業。既知名聞宜，知得名，所以是故次觀佛莊嚴心業。既知三業具足，應知爲人天大師，堪受化者，是誰，是故次觀大衆功德。既知大衆有無量功德，宜知上首者，誰，是故次觀上首。上首是佛，既知上首，恐同長幼，是

故次觀主。既知是主，主有何增上，是故次觀莊嚴不虛作住持。八句次第成也。觀察菩薩者，云何觀察菩薩莊嚴功德成就。觀察菩薩莊嚴功德成就者，觀彼菩薩有四種正修行功德成就。應知眞如是諸法正體體如而行，則是不行不行而行名如實修行體。唯一如而義分爲四，是故四行以一正統之。何者爲四一者於一佛土身不動搖而徧十方種種應

化如實修行常作佛事偈言安樂國清淨常
轉無垢輪化佛菩薩日如須彌住持故開諸
衆生淤泥華故八地已上菩薩常在三昧以
三昧力身不動本處而能徧至十方供養諸
佛教化衆生無垢輪者佛地功德也佛地功
德無習氣煩惱垢佛爲諸菩薩常轉此法輪
諸大菩薩亦能以此法輪開導一切無暫時
休息故言常轉法身如日而應化身光徧諸

世界也言日未足以明不動復言如須彌住
持也淤泥華者經言高原陸地不生蓮華卑
濕淤泥乃生蓮華此喻凡夫在煩惱泥中爲
菩薩開導能生佛正覺華諒夫紹隆三寶常
使不絕二者彼應化身一切時不前不後一
心一念放大光明悉能徧至十方世界教化
衆生種種方便修行所作滅除一切衆生苦
故偈言無垢莊嚴光一念及一時普照諸佛

會利益諸群生故。上言不動而至。容或至有前後是故。復言一念一時無前無後也。三者彼於一切世界無餘照。諸佛會大眾無餘廣大無量供養恭敬讚嘆諸佛如來功德。偈言雨天樂華衣妙香等供養讚諸佛功德無有分別心。故無餘者明徧至一切世界一切諸佛大會無有一世界一佛會不至也。肇公言法身無像而殊形竝應。至韻無言而玄籍彌。

布冥權無謀而動。與事會蓋斯意也。四者彼於十方一切世界無三寶處住持莊嚴佛法僧寶功德大海。徧示令解如實修行。偈言何等世界無佛法功德寶。我願皆往生。示佛法如佛故。上三句雖言徧至。皆是有佛國土。若無此句便是法身有所不法。上善有所不善。觀行體相竟已下。是解義中第四重名。爲淨入願心。淨入願心者。又向說觀察莊嚴佛土。

功德成就莊嚴佛功德成就莊嚴菩薩功德成就此三種成就願心莊嚴應知應知者應知此三種莊嚴成就由本四十八願等清淨願心之所莊嚴因淨故果淨非無因他因有也略說入一法句故上國土莊嚴十七句如來莊嚴八句菩薩莊嚴四句爲廣入一法句者爲略何故示現廣略相入諸佛菩薩有二種法身一者法性法身二者方便法身由法

性法身生方便法身由方便法身出法性法身此二法身異而不可分一而不可同是故廣略相入統以法名菩薩若不知廣略相入則不能自利利他一法句者謂清淨句清淨句者謂真實智慧無爲法身故此三句展轉相入依何義名之爲法以清淨故依何義名爲清淨以真實智慧無爲法身故真實智慧者實相智慧也實相無相故眞智無知也無

爲法身者法性身也法性寂滅故法身無相也無相故能無不相是故相好莊嚴卽法身也無知故能無不知是故一切種智卽真實智慧也以真實而目智慧明智非作非非作也以無爲而標法身明法身非色非非色也非于非者豈非非之能是乎蓋無非之曰是也自是無待復非是也非是非非百非之所不喻是故言清淨句清淨句者謂真實智

慧無爲法身也此清淨有二種應知上轉入句中通一法入清淨通清淨入法身今將別清淨出二種故故言應知何等二種一者器世間清淨二者衆生世間清淨器世間清淨者如向說八種莊嚴佛功德成就四種莊嚴菩薩功德成就是名衆生世間清淨如是一法句攝二種清

淨義應知夫衆生爲別報之體國土爲共報之用體用不一所以應知然諸法心成無餘境界衆生及器復不得異不得一不一則義分不異同清淨器者用也謂彼淨土是彼清淨衆生之所受用故名爲器如淨食用不淨器以器不淨故食亦不淨不淨食用淨器食不淨故器亦不淨要二俱潔乃得稱淨是以一清淨名必攝二種問曰言衆生清淨則是

佛與菩薩彼諸人天得入此清淨數不答曰得名清淨非實清淨譬如出家聖人以殺煩惱賊故名爲比丘凡夫出家者持戒破戒亦名比丘又如灌頂王子初生之時具三十二相卽爲七寶所屬雖未能爲轉輪王事亦名轉輪王以其必爲轉輪王故彼諸人天亦復如是皆入大乘正定之聚畢竟當得清淨法身以當得故得名清淨善巧攝化者如是菩

薩奢摩他毘婆舍那廣略修行成就柔輭心，
柔輭心者謂廣略止觀相順修行成不二心，
也譬如以水取影清靜相資而成就也如實
知廣略諸法如實知者如實相而知也廣中
二十九句略中一句莫非實相也如是成就
巧方便迴向如是者如前後廣略皆實相也
以知實相故則知三界衆生虛妄相也知衆
生虛妄則生真實慈悲也知真實法身則起

真實歸依也慈悲之與歸依巧方便在下何
者菩薩巧方便迴向菩薩巧方便迴向者謂
說禮拜等五種修行所集一切功德善根不
求自身住持之樂欲拔一切衆生苦故作願
攝取一切衆生共同生彼安樂佛國是名菩
薩巧方便迴向成就案王舍城所說無量壽
經三輩生中雖行有優劣莫不發皆無上菩
提之心此無上菩提心卽是願作佛心願作

佛心卽是度衆生心，度衆生心卽是攝取衆生。生有佛國土心，是故願生彼安樂淨土者，要發無上菩提心也。若人不發無上菩提心，但聞彼國土受樂無間爲樂，故願生亦當不得往生也。是故言不求自身住持之樂，欲拔一切衆生苦，故住持樂者謂彼安樂淨土爲阿彌陀如來本願力之所住持受樂無間也。凡釋廻向名義，謂以已所集一切功德施與

一切衆生，共向佛道，巧方便者謂菩薩願以已智慧火燒一切衆生煩惱草木，若有一衆生不成佛，我不作佛，而衆生未盡成佛，菩薩已自成佛，譬如火橋反聽念欲反聽歷摘一切草木燒令使盡，草木未盡，火橋已盡，以後其身而身先故名巧方便。此中言方便者謂作願攝取一切衆生，共同生彼安樂佛國，彼佛國卽是畢竟成佛道路無上方便也。障菩提門

者菩薩如是善知廻向成就即能遠離三種
菩提門相違法何等三種一者依智慧門不
求自樂遠離我心貪著自身故知進守退曰
智知空無我曰慧依智故不求自樂依慧故
遠離我心貪著自身二者依慈悲門拔一切
衆生苦遠離無安衆生心故拔苦曰慈與樂
曰悲依慈故拔一切衆生苦依悲故遠離無
安衆生心三者依方便門憐愍一切衆生心

遠離供養恭敬自身心故正直曰方外已曰
便依正直故生憐愍一切衆生心依外已故
遠離供養恭敬自身心是名遠離三種菩提
門相違法順菩提門者菩薩遠離如是三種
菩提門相違法得三種隨順菩提門法滿足
故何等三種一者無染清淨心以不爲自身
求諸樂故菩提是無染清淨處若爲身求樂
即違菩提是故無染清淨心是順菩提門二

者安清淨心以拔一切衆生苦故菩提是安
穩一切衆生清淨處若不作心拔一切衆生
離生死苦即便違菩提是故拔一切衆生苦
是順菩提門三者樂清淨心以令一切衆生
得大菩提故以攝取衆生生彼國土故菩提
是畢竟常樂處若不令一切衆生得畢竟常
樂則違菩提此畢竟常樂依何而得依大乘
門大乘門者謂彼安樂佛國土是也是故又

言以攝取衆生生彼國土故是名三種隨順
菩提門法滿足應知名義攝對者向說智慧
慈悲方便三種門攝取般若般若攝取方便
應知般若者達如之慧名方便者通權之智
稱達如則心行寂滅通權則備省衆機省機
之智備應而無知寂滅之慧亦無知而備省
然則智慧方便相緣而動相緣而靜動不失
靜智慧之功也靜不廢動方便之力也是故

智慧慈悲方便攝取般若般若攝取方便應
知者謂應知智慧方便是菩薩父母若不依
智慧方便菩薩法則不成就何以故若無智
慧爲衆生時則墮顛倒若無方便觀法性時
則證實際是故應知向說遠離我心貪著自
身遠離無安衆生心遠離供養恭敬自身心
此三種法遠離障菩提心應知諸法各有障
礙相如風能障靜土能障水濕能障火五黑

十惡障人天四顛倒障聲聞果此中三種不
遠離障菩提心應知者若欲得無障當遠離
此三種障礙也向說無染清淨心安清淨心
樂清淨心此三種心畧一處成就妙樂勝眞
心應知樂有三種一者外樂謂五識所生樂
二者內樂謂初禪二禪三禪意識所生樂三
者法樂反五角樂反魯各謂智慧所生樂此智慧
所生樂從愛佛功德起是遠離我心遠離無

安衆生心，遠離自供養心，是三種心清淨。增進略爲妙樂，勝真心妙言其好，以此樂緣佛生故，勝言勝出三界中，樂真言不虛僞，不顛倒願事成就者如，是菩薩智慧心方便心無。郭心勝真心能生清淨佛國土，應知應知者謂應知此四種清淨功德能得生彼清淨佛國土，非是他緣而生也。是名菩薩摩訶薩隨順五種法門所作隨意自在成就如向所說。

身業口業意業智業方便智業隨順法門故隨意自在者言此五種功德力能生清淨佛土出沒自在也。身業者禮拜也口業者讚嘆也意業者作願也智業者觀察也方便智業者廻向也言此五種業和合則是隨順往生淨土法門自在業成就利行滿足者復有五種門漸次成就五種功德應知何者五門一者近門二者大會衆門三者宅門四者屋門

五者園林遊戲地門此五種示現入出次第相入相中初至淨土是近相謂入大乘正定聚近阿耨多羅三藐三菩提入淨土已便入如來大會衆數入衆數已當至修行安心之宅入宅已當至修行所居屋寓尤修行成就已當至教化地教化地卽是菩薩自娛樂地是故出門稱園林遊戲地門此五種門初四種門成就入功德第五門成就出功德此

入出功德何者是釋言入第一門者以禮拜阿彌陀佛爲生彼國故得生安樂世界是名入第一門禮佛願生佛國是初功德相入第二門者以讚嘆阿彌陀佛隨順名義稱如來名依如來光明智相修行故得入大會衆數是名入第二門依如來名義讚嘆是第二功德相入第三門者以一心專念作願生彼修奢摩他寂靜三昧行故得入蓮華藏世界是

名入第三門爲修寂靜止故一心願生彼國
是第三功德相入第四門者以專念觀察彼
妙莊嚴修毘婆舍那故得到彼所受用種種
法味樂是名入第四門種種法味樂者毘婆
舍那中有觀佛國土清淨味攝受衆生大乘
味畢竟住持不虛作味類事起行願取佛土
味有如是等無量莊嚴佛道味故言種種是
第四功德相出第五門者以大慈悲觀察一

切苦惱衆生示應化身廻入生死園煩惱林
中遊戲神通至教化地以本願力廻向故是
名出第五門示應化身者如法華經普門示
現之類也遊戲有二義一者自在義菩薩度
衆生譬如師子搏鹿所爲不難如似遊戲二
者度無所度義菩薩觀衆生畢竟無所有雖
度無量衆生實無一衆生得滅度者示度衆
生如似遊戲言本願力者示大菩薩於法身

中常在_{三昧}而現種種身種種神通種種說法皆以本願力起譬如阿修羅琴雖無鼓者而音曲自然是名教化地第五功德相抄已出爾者大聖真言誠知證大涅槃籍願力廻向還相利益顯利他正意是以論主宣布廣大無礙一心普徧開化雜染堪忍群萌宗師顯示大悲往還廻向慇懃弘宣他利利他深義仰可奉持特可頂戴矣

顯淨土真實證文類四

[Blank text area]

[Blank text area]

光明無量之願

壽命無量之願

顯淨土真佛土文類五

愚禿釋親鸞集

謹按真佛土者佛者則是不可思議光如來土者亦是無量光明土也然則酬報大悲誓願故曰真報佛土既有願即光明壽命之願是也大經言設我得佛光明有能限量下至不照百千億那由他諸佛國者不取正覺又願言設我得佛壽命有能限量下至百千

億那由他劫者不取正覺願成就文言佛告
阿難無量壽佛威神光明最尊第一諸佛光
明所不能及至乃是故無量壽佛號無量光佛
無邊光佛無礙光佛無對光佛燄王光佛清
淨光佛歡喜光佛智慧光佛不斷光佛難思
光佛無稱光佛超日月光佛其有衆生遇斯
光者三垢消滅身意柔輒歡喜踊躍善心生
焉若在三塗勤苦之處見此光明皆得休息

無復苦惱壽終之後皆蒙解脫無量壽佛光
明顯赫照耀十方諸佛國土莫不聞焉不但
我今稱其光明一切諸佛聲聞緣覺諸菩薩
衆咸共嘆譽亦復如是若有衆生聞其光明
威神功德日夜稱說至心不斷隨意所願得
生其國爲諸菩薩聲聞大衆所共嘆譽稱其
功德至其然後得佛道時普爲十方諸佛菩
薩嘆其光明亦如今也佛言我說無量壽佛

光明威神巍巍殊妙。晝夜一劫。尙未能盡佛
語。阿難無量壽佛壽命長久。不可勝計。汝寧
知乎。假使十方世界無量衆生。皆得人身。悉
令成就。聲聞緣覺。都共集會。禪思一心。竭其
智力。於百千萬劫。悉共推算。計其壽命長遠
之數。不能窮盡。知其限極。無量壽如來會
言。阿難以是義。故無量壽佛復有異名。謂無
量光。無邊光。無著光。無礙光。光照王端嚴光。

愛光。喜光。可觀光。不思議光。無等光。不可稱
量光。映蔽日光。映蔽月光。掩奪日月光。彼之
光明清淨廣大。普令衆生身心悅樂。復令一
切餘佛刹中。天龍夜叉阿修羅等。皆得歡悅。
無量清淨平等覺經言。速疾超。便可到安
樂國之世界。至無量光明土。供養於無數佛。
佛說諸佛阿彌陀三耶三佛薩樓佛檀過
度人道經。言佛言阿彌陀佛光明最尊

第一無比諸佛光明皆所不及也八方上下無央數諸佛中有佛頂中光明照七丈有佛頂中光明照一里至乃有佛頂中光明照二百萬佛國佛言諸八方上下無央數佛頂中光明所照皆如是也阿彌陀佛頂中光明所照千萬佛國所以諸佛光明所照有近遠者何本其前世宿命求道爲菩薩時所願功德各自有大小至其然後作佛時各自得之

是故令光明轉不同等諸佛威神同等耳自在意所欲作爲不豫計阿彌陀佛光明所照最大諸佛光明皆所不能及也佛稱譽阿彌陀佛光明極善阿彌陀佛光明極善善中明好甚快無比絕殊無極也阿彌陀佛光明清潔無瑕穢無缺減也阿彌陀佛光明殊好勝於日月之明百千億萬倍諸佛光明中之極明也光明中之極好也光明中之極雄傑也

光明中之快善也諸佛中之王也光明中之
極尊也光明中之最明無極也炎照諸無數
天下幽冥之處皆常大明諸有人民蜎飛蠕
動之類莫不見阿彌陀佛光明也見者莫不
慈心歡喜者世間諸有媼泯瞋怒愚癡者見
阿彌陀佛光明莫不作善也諸在泥犁禽獸
薜荔考掠勤苦之處見阿彌陀佛光明至皆
休止不復治死後莫不得解脫憂苦者也阿

彌陀佛光明名聞八方上下無窮無極無央
數諸佛國諸天人民莫不聞知聞知者莫不
度脫也佛言不獨我稱譽阿彌陀佛光明也
八方上下無央數佛辟支佛菩薩阿羅漢所
稱譽皆如是佛言其有人民善男子善女人
聞阿彌陀佛聲稱譽光明朝暮常稱譽其光
明好至心不斷絕在心所願往生阿彌陀佛
國也不空縞索神變眞言經言汝當生處是

阿彌陀佛清淨報土蓮華化生常見諸佛證諸法忍壽命無量百千劫數直至阿耨多羅三藐三菩提不復退轉我常祐護_上涅槃經言又解脫者名曰虛無虛無即是解脫解脫即是如來如來即是虛無非作所作_{至乃}真解脫者不生不滅是故解脫即是如來如來亦爾不生不滅不老不死不破不壞非有爲法以是義故名曰如來入大涅槃_{至乃}又解脫者

名無上上_{至乃}無上上者即真解脫真解脫者即是如來_{至乃}若得成於阿耨多羅三藐三菩提已無愛無疑無愛無疑即真解脫真解脫者即是如來_{至乃}如來者即是涅槃涅槃者即是無盡無盡者即是佛性佛性者即是決定決定者即是阿耨多羅三藐三菩提迦葉菩薩白佛言世尊若涅槃佛性決定如來是一義者云何說言有三歸依佛告迦葉善男子

一切衆生怖畏生死故求三歸以三歸故則知佛性決定涅槃善男子有法名一義異有法名義俱異名一義異者佛常法常比丘僧常涅槃虛空皆是常是名名一義異名義俱異者佛名爲覺法名不覺僧名和合涅槃名解脫虛空名非善亦名無礙是爲名義俱異善男子三歸依者亦復如是出抄又言光明者名不羸劣不羸劣者名曰如來又光明者

名爲智慧出又言善男子一切有爲皆是無常虛空無爲是故爲常佛性無爲是故爲常虛空者卽是佛性佛性者卽是如來如來者卽是無爲無爲者卽是常常者卽是法法者卽是僧僧卽無爲無爲者卽是常至乃善男子譬如從牛出乳從乳出酪從酪出生蘇從生蘇出熟蘇從熟蘇出醍醐醍醐最上若有服者衆病皆除所有諸藥悉入其中善男子佛

亦如是從佛出十二部經從十二部經出修
多羅從修多羅出方等經從方等經出般若
波羅蜜從般若波羅蜜出大涅槃猶如醍醐
言醍醐者喻於佛性佛性者即是如來善男
子以是義故說言如來所有功德無量無邊
不可稱計出抄又言善男子道有二種一者常
二者無常菩提之相亦有二種一者常二者
無常涅槃亦爾外道道者名為無常內道道

者名之為常聲聞緣覺所有菩提名為無常
菩薩諸佛所有菩提名之為常外解脫者名
為無常內解脫者名之為常善男子道與菩
提及以涅槃悉名為常一切眾生常為無量
煩惱所覆無慧眼故不能得見而諸眾生為
欲見故修戒定慧以修行故見道菩提及以
涅槃是名菩薩得道菩提涅槃道之性相實
不生滅以是義故不可捉持至乃道者雖無色

像可見稱量可知而實有用至乃如衆生心雖
是非色非長非短非麤非細非縛非解非是
見法而亦是有出抄又言善男子有大樂故名
大涅槃涅槃無樂以四樂故名大涅槃何等
爲四一者斷諸樂故不斷樂者則名爲苦若
有苦者不名大樂以斷樂故則無有苦無苦
無樂乃名大樂涅槃之性無苦無樂是故涅
槃名爲大樂以是義故名大涅槃復次善男

子樂有二種一者凡夫二者諸佛凡夫之樂
無常敗壞是故無樂諸佛常樂無有變易故
名大樂復次善男子有三種受一者苦受二
者樂受三者不苦不樂受不苦不樂是亦爲
苦涅槃雖同不苦不樂然名大樂以大樂故
名大涅槃二者大寂靜故名爲大樂涅槃之
性是大寂靜何以故遠離一切憒鬧法故以
大寂故名大涅槃三者一切知故名爲大樂

非一切知不名大樂諸佛如來一切知故名
爲大樂以大樂故名大涅槃四者身不壞故
名爲大樂身若可壞則不名樂如來之身金
剛無壞非煩惱身無常之身故名大樂以大
樂故名大涅槃上已又言不可稱量不可思議
故得名爲大般涅槃以純淨故名大涅槃云
何純淨淨有四種何等爲四一者二十五有
名爲不淨能永斷故得名爲淨淨卽涅槃如

是涅槃亦得名有而是涅槃實非是有諸佛
如來隨世俗故說涅槃有譬如世人非父言
父非母言母實非父母而言父母涅槃亦爾
隨世俗故說言諸佛有大涅槃二者業清淨
故一切凡夫業不清淨故無涅槃諸佛如來
業清淨故故名大淨以大淨故名大涅槃三
者身清淨故身若無常則名不淨如來身常
故名大淨以大淨故名大涅槃四者心清淨

故心若有漏名曰不淨佛心無漏故名大淨
以大淨故名大涅槃善男子是名善男子善
女人出妙又言善男子諸佛如來煩惱不起是
名涅槃所有智慧於法無礙是爲如來如來
非是凡夫聲聞緣覺菩薩是名佛性如來身
心智慧徧滿無量無邊阿僧祇土無所障礙
是名虛空如來常住無有變易名曰實相以
是義故如來實不畢竟涅槃是名菩薩上又

言迦葉菩薩言世尊佛性者常猶如虛空何
故如來說言未來如來若言一闍提輩無善
法者一闍提輩於其同學同師父母親族妻
子豈當不生愛念心耶如其生者非是善乎
佛言善哉善哉善男子快發斯問佛性者猶
如虛空非過去非未來非現在一切衆生有
三種身所謂過去未來現在衆生未來具足
莊嚴清淨之身而得見佛性是故我言佛性

未來善男子我爲衆生或時說因爲果或時說果爲因是故經中說命爲食見色名觸未來身淨故說佛性世尊如佛所說義如是者何故說言一切衆生悉有佛性善男子衆生佛性雖現在無不可言無如虛空性雖無現在不得言無一切衆生雖復無常而是佛性常住無變是故我於此經中說衆生佛性非內非外猶如虛空非內非外如其虛空有內

外者虛空不名爲一爲常亦不得言一切處有虛空雖復非內非外而諸衆生悉皆有之衆生佛性亦復如是如汝所言一闍提輩有善法者是義不然何以故一闍提輩若有身業口業意業取業求業施業解業如是等業悉是邪業何以故不求因果故善男子如訶梨勒果根莖枝葉華實悉苦一闍提業亦復如是也又言善男子如來具足知諸根力是

故善能分別衆生，上中下根，能知是人轉下，
作中能知是人轉中，作上能知是人轉上，作
中能知是人轉中，作下是故當知衆生根性，
無有決定以無定故，或斷善根斷已，還生若
諸衆生根性定者，終不先斷斷已，復生亦不
應說一闡提輩墮於地獄壽命一劫，善男子
是故如來說一切法無有定相，迦葉菩薩白
佛言世尊如來具足知諸根力，定知善星當

斷善根以何因緣，聽其出家，佛言善男子我
於往昔初出家時，吾弟難陀從弟阿難達婆
達多子羅睺羅如是等輩皆悉隨我出家修
道，我若不聽善星出家，其人次當得紹王位，
其力自在，當壞佛法，以是因緣，我便聽其出
家修道，善男子善星比丘若不出家，亦斷善
根於無量世都無利益，今出家已，雖斷善根，
受持戒供養恭敬耆舊長宿有德之人修習

初禪乃至四禪，是名善因。如是善因能生善法，善法既生，能脩習道。既修習道，當得阿耨多羅三藐三菩提。是故我聽善星出家，善男子。若我不聽，善星比丘出家受戒，則不得稱我為如來。具足十力，善男子。如來善知衆生，如是上中下根，是故稱佛。具知根力，迦葉菩薩白佛言：世尊，如來具足是知根力，是故能知一切衆生。上中下根利鈍差別，隨人隨

意隨時故名如來。知諸根力，或有說言：犯四重禁，作五逆罪，一闍提等，皆有佛性。如來世尊，為國土故，為時節故，為他語故，為人故，為衆根故，於一法中，作二種說。於一名法說無量名，於一義中說無量名。於無量義說無量名，云何一名說無量名？猶如涅槃，亦名涅槃，亦名無生，亦名無出，亦名無作，亦名無為，亦名歸依，亦名窟宅，亦名解脫，亦名光明。

亦名燈明亦名彼岸亦名無畏亦名無退亦
名安處亦名寂靜亦名無相亦名無二亦名
一行亦名清涼亦名無闇亦名無礙亦名無
諍亦名無濁亦名廣大亦名甘露亦名吉祥
是名一名作無量名云何一義說無量名猶
如帝釋至乃云何於無量義說無量名如佛如
來名爲如來義異名異亦名阿羅訶義異名
異亦名三藐三佛陀義異名異亦名船師亦

名導師亦名正覺亦名明行足亦名大師子
王亦名沙門亦名婆羅門亦名寂靜亦名施
主亦名到彼岸亦名大醫王亦名大象王亦
名大龍王亦名施眼亦名大力士亦名大無
畏亦名寶聚亦名商主亦名得解脫亦名大
丈夫亦名天人師亦名大分陀利亦名獨無
等侶亦名大福田亦名大智海亦名無相亦
名具足八智如是，一切義異名異善男子是

名無量義中說無量名復有一義說無量名所謂如陰亦名為陰亦名顛倒亦名為諦亦名為四念處亦名四食亦名四識住處亦名為有亦名為道亦名為時亦名為衆生亦名為世亦名第一義亦名三修謂身戒心亦名因果亦名煩惱亦名解脫亦名十二因緣亦名聲聞辟支佛亦名地獄餓鬼畜生人天亦名過去現在未來是名一義說無量名善男

子如來世尊為衆生故廣中說畧略中說廣第一義諦說為世諦說世諦法為第一義諦出抄又言迦葉復言世尊第一義諦亦名為道亦名菩提亦名涅槃至乃又言善男子我於經中說如來身凡有二種一者生身二者法身言生身者即是方便應化之身如是身者可得言是生老病死長短黑白是此是彼是學無學我諸弟子聞是說已不解我意唱言如

來定說佛身是有爲法法身卽是常樂我淨
永離一切生老病死非白非黑非長非短非
此非彼非學非無學若佛出世及不出世常
住不動無有變易善男子我諸弟子聞是說
已不解我意唱言如來定說佛身是無爲法
又言如我所說十二部經或隨自意說或隨
他意說或隨自他意說至乃善男子如我所說
十住菩薩少見佛性是名隨他意說何故名

少見十住菩薩得首楞嚴等三昧三千法門
是故了了自知當得阿耨多羅三藐三菩提
不見一切衆生定得阿耨多羅三藐三菩提
是故我說十住菩薩少分見佛性善男子我
常宣說一切衆生悉有佛性是名隨自意說
一切衆生不斷不滅乃至得阿耨多羅三藐
三菩提是名隨自意說一切衆生悉有佛性
煩惱覆故不能得見我說如是汝說亦爾是

名隨自他意說善男子如來或時爲一法故說無量法出抄又言一切覺者名爲佛性十住菩薩不得名爲一切覺故是故雖見而不明了善男子見有二種一者眼見二者聞見諸佛世尊眼見佛性如於掌中觀阿摩勒十住菩薩聞見佛性故不了了十住菩薩雖能自知定得阿耨多羅三藐三菩提而不能知一切衆生悉有佛性善男子復有眼見諸佛如

來十住菩薩眼見佛性復有聞見一切衆生乃至九地聞見佛性菩薩若聞一切衆生悉有佛性心不生信不名聞見至乃師子吼菩薩摩訶薩言世尊一切衆生不能得知如來心相當云何觀而得知耶善男子一切衆生實不能知如來心相若欲觀察而得知者有二因緣一者眼見二者聞見若見如來所有身業當知是則爲如來也是名眼見若觀如來

所有口業當知是則爲如來也是名聞見若見色貌一切衆生無與等者當知是則爲如來也是名眼見若聞音聲微妙最勝不同衆生所有音聲當知是則爲如來也是名聞見若見如來所作神通爲衆生爲利養若爲衆生不爲利養當知是則爲如來也是名眼見若觀如來以他心智觀衆生時爲利養說爲衆生說若爲衆生不爲利養當知是則

爲如來也是名聞見出淨土論曰世尊我心歸命盡十方無礙光如來願生安樂國觀彼世界相勝過三界道究竟如虛空廣大無邊際上已註論曰莊嚴清淨功德成就者偈言觀彼世界相勝過三界道故此云何不思議有凡夫人煩惱成就亦得生彼淨土三界繫業畢竟不牽則是不斷煩惱得涅槃分焉可思議又言正道大慈悲出世善根生此二句

名莊嚴性功德成就至乃性是本義言此淨土隨順法性不乖法本事同華嚴經寶王如來性起義又言積習成性指法藏菩薩集諸波羅蜜積習所成亦言性者是聖種性序法藏菩薩於世自在王佛所悟無生忍爾時位名聖種性於是性中發四十八大願修起此土卽曰安樂淨土是彼因所得果中說因故名爲性又言性者是必然義不改義如海性一

味衆流入者必爲一味海味不隨彼改也又如人身性不淨故種種妙好色香美味入身皆爲不淨安樂淨土諸往生者無不淨色無不淨心畢竟皆得清淨平等無爲法身以安樂國土清淨性成就故正道大慈悲出世善根生者平等大道也平等道所以名爲正道者平等是諸法體相以諸法平等故發心等發心等故道等道等大慈悲等大慈悲是

佛道正因故言正道大慈悲慈悲有三緣一者衆生緣是小悲二者法緣是中悲三者無緣是大悲大悲卽是出世善也安樂淨土從此大悲生故故謂此大悲爲淨土之根故曰出世善根生又云問曰尋法藏菩薩本願力及龍樹菩薩所讚皆似以彼國聲聞衆多爲奇此有何義答曰聲聞以實際爲證計不應更能生佛道根芽而佛以本願不可思議神

力攝令生彼必當復以神力生其無上道心譬如鳩鳥入水魚蚌咸死犀牛觸之死者皆活如此不應生而生所以可奇然五不思議中佛法最不可思議佛能使聲聞復生無上道心眞不可思議之至也又云不可思議力者總指彼佛國土十七種莊嚴功德力不可得思議也諸經說言有五種不可思議一者衆生多生不可思議二者業力不可思議三

者龍力不可思議四者禪定力不可思議五者佛法力不可思議此中佛土不可思議有二種力一者業力謂法藏菩薩出世善根大願業力所成二者正覺阿彌陀法王善住持力所攝又云示現自利利他者略說彼阿彌陀佛國土十七種莊嚴功德成就示現如來自身利益大功德力成就利益他功德成就故言畧者彰彼淨土功德無量非唯十七種

也夫須彌之入芥子毛孔之納大海豈山海之神乎毛芥之力乎能神者神之耳又云何者莊嚴不虛作住持功德成就偈言觀佛本願力遇無空過者能令速滿足功德大寶海故不虛作住持功德成就者蓋是阿彌陀如來本願力也至乃所言不虛作住持者依本法藏菩薩四十八願今日阿彌陀如來自在神力願以成力力以就願願不徒然力不虛設

力願相符畢竟不差故曰成就出抄讚阿彌陀

佛偈曰佛造南無阿彌陀佛釋名無量壽傍經奉讚亦曰安養成

佛已來歷十劫壽命方將無有量法身光輪

徧法界照世盲冥故頂禮智慧光明不可量

故佛又號無量光有量諸相蒙光曉是故稽

首眞實明解脫光輪無限齊故佛又號無邊

光蒙光觸者離有無是故稽首平等覺光雲

無礙如虛空故佛又號無礙光一切有礙蒙

光澤是故頂禮難思議清淨光明無有對故

佛又號無對光遇斯光者業繫除是故稽首

畢竟依佛光照耀最第一故佛又號光炎王

三塗黑闇蒙光啓是故頂禮大應供道光

朗色超絕故佛又號清淨光一蒙光照罪垢

除皆得解脫故頂禮慈光遐被施安樂故佛

又號歡喜光光所至處得法喜稽首頂禮大

安慰佛光能破無明闇故佛又號智慧光一

顯淨土真佛土文類

三

切諸佛三乘衆咸共嘆譽故稽首光明一切時普照故佛又號不斷光聞光力故心不斷皆得往生故頂禮其光除佛莫能測故佛又號難思光十方諸佛嘆往生稱其功德故稽首神光離相不可名故佛又號無稱光因光成佛光赫然諸佛所嘆故頂禮光明照曜過日月故佛號超日月光釋迦佛嘆尙不盡故我稽首無等等_{至乃}本師龍樹摩訶薩誕形像

始理頹綱關閉邪扇開正轍是閻浮提一切眼伏承尊語歡喜地歸阿彌陀生安樂我從無始循三界爲虛妄輪所廻轉一念一時所造業足繫六道滯三塗唯願慈光護念我令我不失菩提心我讚佛慧功德音願聞十方諸有緣欲得往生安樂者普皆如意無障礙所有功德若大小廻施一切共往生南無不可思議光一心歸命稽首禮十方三世無量

慧同乘一如號正覺二智圓滿道平等攝化
隨緣故若干我歸阿彌陀淨土即是歸命諸
佛國我以一心讚一佛願徧十方無礙人如
是十方無量佛咸各至心頭面禮抄已出上光明
寺和尚云問曰彌陀淨國為當是報是化也
答曰是報非化云何得知如大乘同性經說
西方安樂阿彌陀佛是報佛報土又無量壽
經云法藏比丘在世饒王佛所行菩薩道時

發四十八願一一願言若我得佛十方衆生
稱我名號願生我國下至十念若不生者不
取正覺今既成佛即是酬因之身也又觀經
中上輩三人臨命終時皆言阿彌陀佛及與
化佛來迎此人然報身兼化共來授手故名
為與以此文證故知是報然報應二身者眼
目之異名前翻報作應後翻應作報凡言報
者因行不虛定招來果以果應因故名為報

又三大僧祇所修萬行必定應得菩提今既道成卽是應身斯乃過現諸佛辨立三身除斯已外更無別體縱使無窮八相名號塵沙尅體而論衆歸化攝今彼彌陀現是報也問曰旣言報者報身常住永無生滅何故觀音授記經說阿彌陀佛亦有入涅槃時此之一義若爲通釋答曰入不入義者唯是諸佛境界尙非三乘淺智所闕豈況小凡輒能知也

雖然必欲知者敢引佛經以爲明證何者如大品經涅槃非化品中說云佛告須菩提於汝意云何若有化人作化人是化頗有實事不空者不須菩提言不也世尊佛告須菩提色卽是化受想行識卽是化乃至一切種智卽是化須菩提白佛言世尊若世間法是化出世間法亦是化所謂四念處四正勤四如意足五根五力七覺分八聖道分三解脫門

佛十力四無所畏四無礙智十八不共法并諸法果及賢聖人所謂須陀洹斯陀含阿那含阿羅漢辟支佛菩薩摩訶薩諸佛世尊是法亦是化不佛告須菩提一切法皆是化於是法中有聲聞法變化有辟支佛法變化有菩薩法變化有諸佛法變化有煩惱法變化有業因緣法變化以是因緣故須菩提一切法皆是化須菩提白佛言世尊是諸煩惱斷

所謂須陀洹果斯陀含果阿那含果阿羅漢果辟支佛道斷諸煩惱習皆是變化不佛告須菩提若有法生滅相者皆是變化須菩提言世尊何等法非變化佛言若法無生無滅是非變化須菩提言何等是不生不滅非變化佛言無誑相涅槃是法非變化世尊如佛自說諸法平等非聲聞作非辟支佛作非諸菩薩摩訶薩作非諸佛作有佛無佛諸法性

常空性空卽是涅槃云何涅槃一法非如化佛告須菩提如是如是諸法平等非聲聞所作乃至性空卽是涅槃若新發意菩薩聞是一切法皆畢竟性空乃至涅槃亦皆如化者心則驚怖爲是新發意菩薩故分別生滅者如化不生不滅者不如化耶今旣以斯聖教驗知彌陀定是報也縱使後入涅槃其義無妨諸有智者應知問曰彼佛及土旣言報者

報法高妙小聖難階垢障凡夫云何得入答曰若論衆生垢障實難忻趣正由託佛願以作強緣致使五乘齊入又云從我今樂生彌陀已下正明夫人別選所求此明彌陀本國四十八願願願皆發增上勝因依因起於勝行依行感於勝果依果感成勝報依報感成極樂依樂顯通悲化依於悲化顯開智慧之門然悲心無盡智亦無窮悲智雙行卽廣開

甘露因茲法潤普攝群生也諸餘經典勸處
 彌多衆聖齊心皆同指讚有此因緣致使如
 來密遣夫人別選也又云西方寂靜無爲樂
 畢竟逍遙離有無大悲薰心遊法界分身利
 物等無殊歸去來魔鄉不可停曠劫來流轉
 六道盡皆逕到處無餘樂唯聞愁嘆聲畢此
 生平後入彼涅槃城又云極樂無爲涅槃界
 隨緣雜善恐難生故使如來選要法教念彌

陀專復專又云從佛逍遙歸自然自然即是
 彌陀國無漏無生還卽眞行來進止常隨佛
 證得無爲法性身又云彌陀妙果號曰無上
 涅槃抄已出上憬興師云無量光佛非算無邊光
 佛無緣不照故無礙光佛無有三人法而能照故無對光佛非諸菩薩之所及故
 光炎王佛光明自在更無爲上故清淨光佛從無貪善根而現故亦除衆生貪濁之心也無貪濁
 歡喜光佛從無瞋善根而生故能除衆生瞋恚盛心故智慧光佛從無
 不斷光佛疑善根心起復除衆生無明品心故難思光佛非諸二乘所測

故度無稱光佛亦非餘乘等超日月光佛

日夜恒照不同
娑婆二類之光

故抄已上皆是蒙光觸身者身心柔輒願之所致也

淨刹真報土抄已上惑染衆生於此不能見性所覆

煩惱故經言我說十住菩薩少分見佛性故

知到安樂佛國即必顯佛性由本願力廻向

故亦經言衆生未來具足莊嚴清淨之身而

得見佛性起信論曰若知雖說無有能說可

說雖念亦無能念可念名為隨順若離於念
名為得入得入者真如三昧也况乎無念之
位在於妙覺蓋以了心初生之相也而言知
初相者所謂無念非菩薩十地所知而今之
人尙未階十信即不依馬鳴大士從說入無
說從念入於無念抄已上夫按報者由如來願海
酬報果成土故曰報也然就願海有真有假
是以復就佛土有真有假由選擇本願之正


因成就真佛土言真佛者大經言無邊光佛無礙光佛又言諸佛中之王也光明中之極尊也上論曰歸命盡十方無礙光如來也言真土者大經言無量光明土或言諸智土上論曰究竟如虛空廣大無邊際也言往生者大經言皆受自然虛無之身無極之體上論曰如來淨華衆正覺華化生又云同一念佛無別道故上又云難思議往生是也假之佛

土者在下應知既以真假皆是酬報大悲願海故知報佛土也良假佛土業因千差土復應千差是名方便化身化土由不知真假迷失如來廣大恩德因茲今顯真佛真土斯乃真宗之正意也經家論家之正說淨土宗師之解義仰可敬信特可奉持也可知

顯淨土真佛土文類五

255
518

皇清三十八年



特35
910

017604-003-8

特35-910

教行信証

M45.4

ABF-0400



255
518

國朝詩林卷之四

四